

無極縣志卷之八

人物志下

甄皇后傳

文昭甄皇后中山無極人明帝母漢大保甄邯後也世吏二千石父逸上蔡令后三歲失父後天下兵亂加以饑饉百姓皆賣金銀珠玉寶物時后家大有儲穀頗以買之后年十餘歲白母曰今世亂而多買寶物匹夫無罪懷寶爲罪又左右皆饑乏不如以穀賑給親族隣里廣爲恩惠也舉家稱善卽從后言建安中袁紹爲中子熙納之出爲幽州后留養姑及冀州平

文帝納后於鄴有寵生明帝及東鄉公主廷康元年
文帝卽王位六月南征后留鄴黃初元年十月帝踐
祚踐祚之後山陽公奉二女以嬪於魏郭后李陰貴
人並愛幸后愈失意有怨言帝大怒二年六月遣使
賜死葬於鄴明帝卽位有司奏請追諡使司空王朗
持節奉策以太牢告祠於陵又別立寢廟太和元年
三月以中山魏昌之安城鄉戶千追封逸諡曰敬侯
適孫像襲爵四月初營宗廟掘地得玉璽方一寸九
分其文曰天子羨思慈親明帝爲之改容以太牢告
廟又嘗夢見后于是差次舅氏親疏高下叙用各有

差賞賜累鉅萬以像爲虎賁中郎將是月后母薨帝制總服臨喪百僚陪位四年十一月以后舊陵卑下使像兼太尉持節詣鄴昭告后土十二月改葬朝陽陵像還遷散騎常侍青龍二年春追諡后兄儼曰安城鄉穆侯夏吳賊寇揚州以像爲伏波將軍持節監諸將東征還復爲射聲校尉三年薨追贈衛將軍改封魏昌縣諡曰貞侯子暘嗣又封暘弟韓豔皆爲列侯四年改逸儼本封皆曰魏昌侯諡因故封儼世婦劉爲東鄉君又追封逸世婦張爲安喜君景初元年夏有司議定七廟冬又奏曰蓋帝王之興既有受命

之君又有聖妃協于神靈然後克昌厥世以成王業
焉昔高辛氏卜其四妃之子皆有天下而帝摯陶唐
商周代興周人上推后稷以配皇天追述王初本之
姜嫄特立宮廟世世享嘗周禮所謂奏夷則歌中呂
舞大濩以享先妣者也詩人頌之曰厥初生民時維
姜嫄言王化之本生民所由又曰閟宮有恤實實枚
枚赫赫姜嫄其德不回詩禮所稱姬宗之盛其美如
此大魏期運繼于有虞然崇弘帝道三代彌隆廟祧
之數實與周同今武宣皇后文德皇后各配無窮之
祚至於文昭皇后膺天靈符誕育明聖功濟生民德

盈宇宙開諸後嗣乃道化之所興也寢廟特祀亦姜
姬之閼宮也而未著不毀之制懼論功報德之義萬
世或闕焉非所以昭孝示後世也文昭廟宜世世享
祀奏樂與祖廟同永著不毀之典以播聖善之風於
是與七廟議並勒金策藏之金匱帝思念舅氏不已
暢尙幼景初末以暢爲射聲校尉加散騎常侍又特
爲起大第車駕親自臨之又于其後園爲像母起觀
廟名其里曰渭陽里以追思母氏也嘉平三年正月
暢薨追贈車騎將軍謚曰恭侯子紹嗣太和六年明
帝愛女淑薨追封謚淑爲平原懿公主爲之立廟取

后亡從孫黃與合葬追封黃列侯以夫人郭氏從弟
惠爲之後承甄氏姓封惠爲平原侯襲公主爵青龍
中又封后從兄子毅及像弟三人皆爲列侯毅數上
疏陳時政官至越騎校尉嘉平中復封暢子二人爲
列侯后兄儼孫女爲齊王皇后后父已沒封后母爲
廣樂鄉君

甄琛傳

載魏書卷六十八

甄琛字思伯中山毋極人漢太保甄邯後也父凝州主
簿琛少敏悟閨門之內兄弟戲狎不以禮法自居頗
學經史稱有刀筆而形貌短陋眇風儀舉秀才入都

積歲頗以奕棋棄日至乃通夜不止手下蒼頭常令
秉燭或時睡頓大加其杖如此非一奴後不勝楚痛
乃白琛曰郎君辭父母仕宦京師若爲讀書執燭奴
不敢辭罪乃以圍棋日夜不息豈是向京之意而賜
加杖罰不亦非理琛惕然慙感遂從許叡李彪假書
研習聞見益優太和初拜中書博士遷諫議大夫時
有所陳亦爲高祖知賞轉通直散騎侍郎出爲本州
征北府長史後爲本州陽平王頤衛軍府長史世宗
踐祚以琛爲中散大夫兼御史中尉轉通直散騎常
侍仍兼中尉乃上鹽禁疏甚切中

見藝文

遷侍中領中

尉琛俛眉畏避不能繩糾貴遊凡所劾治率多下吏
於時趙修盛寵琛傾身事之琛父凝爲中散大夫弟
僧林爲本州別駕皆託修申達至修姦詐事露明當
收考今日乃舉其罪及監決修鞭猶相隱惻然告人
曰趙修小人背如土牛殊耐鞭杖有識以此非之修
死之明日琛與黃門郎李憑以朋黨被召詣尙書兼
尙書元英邢巒窮其阿附之狀琛曾拜官諸賔悉集
巒乃晚至琛謂巒曰卿何處放蛆來今晚始顧雖以
戲言巒變色銜忿及此大相推窮琛遂免歸本郡左
右相連死黜者三十餘人始琛以父母年老常求解

官扶侍故高祖授以本州長史及貴達不復請歸至
是乃還供養數年遭母憂母鉅鹿曹氏有孝性夫氏
去家路踰百里每得魚肉菜果珍美口實者必令僮
僕走奉其母乃後食焉琛母服未闋復喪父琛於塋
兆之內手種松栢隆冬之月負掘水土鄉老哀之咸
助加力十餘年中墳成木茂與弟僧林誓以同居沒
齒專事產業親躬農圃時以鷹犬馳逐自娛朝廷有
大事猶上表陳情久之復除散騎常侍領給事黃門
侍郎定州大中正大見親寵委以門下庶事出叅尙
書入厠帷幄盧昶敗於朐山詔琛馳驛檢按遷河南

尹加平南將軍黃門中正如故琛復上京邑建官表

見藝文

尋徵拜太常卿仍以本將軍出爲徐州刺史及

入辭肅宗琛辭以老詔除吏部尙書將軍如故未幾

除征北將軍定州刺史衣錦晝遊大爲稱滿治體嚴

細甚無聲譽崔光辭司徒之授也琛與光書外相抑

揚內實附會也光亦揣其意復書褒美以悅之徵爲

車騎將軍特進又拜侍中以其衰老詔賜御府杖朝

直杖以出入正光五年冬卒詔給東園秘器朝服一

具衣一襲錢十萬物七百段蠟三百斤贈司徒公尙

書左僕射加後部鼓吹太常議謚文穆吏部郎袁翻

奏曰案禮謚者行之迹也號者功之表也車服者位之章也是以大行受大名細行受細名行生於己名生於人故闔棺然後定謚皆累其生時美惡所以爲將來勸戒身雖死使名常存也凡薨亡者屬所卽言大鴻臚移本郡大中正條其行迹功過承中正移言公府下太常部博士評議爲謚列上謚不應法者博士坐如選舉不以實論若行狀失實中正坐如博士自古帝王莫不殷勤重慎以爲褒貶之實也今之行狀皆出自其家任其臣子自言君父之行無復相是非之事臣子之欲光揚君父但苦迹之不高行之不

美是以極辭肆意無復限量觀其狀也則周孔聯鑣
伊顏接袵論其謚也雖窮文盡武罔或加焉然今之
博士與古不同唯知依其行狀又先問其家人之意
臣子所求便爲議上都不復斟酌與奪商量是非致
號謚之加與汎階莫異專以極美爲稱無復貶降之
名禮官之失一至於此案甄司徒行狀至德與聖人
齊蹤鴻名共大賢比跡文穆之謚何足加焉但比來
贈謚於例普重如甄琛之流無不複謚謂宜依謚法
慈惠愛民曰孝宜謚曰孝穆公自今已後明勅太常
司徒有行狀如此言辭流宕無復節限者悉請裁量

不聽爲受必準人立謚不得甚加優越復仍踵前來
之失者付法司科罪從之琛祖載肅宗親送降車就
輿弔服哭之遣舍人慰其諸子琛性輕簡好嘲謔故
少風望然明解有幹具在官清白自高祖世宗咸相
知待肅宗以師傅之義而加禮焉所著文章鄙碎無
大體時有理詣磔四聲姓族廢興會通緇素三論及
家誨二十篇篤學文一卷頗行於世

按舊誌列甄琛于鑒戒以琛多戲狎始傾身趙修至
修被考乃謔詈之以此詬病琛然論人當觀于其大
琛聞僕之誠而惕然慚感假書研習其改過之勇如

此營親兆負掘水土與弟誓同居沒齒孝友尤足嘉
尚奏免鹽禁一疏深得藏富于民之意史稱其性輕
簡好嘲謔故少風望然明解有幹具在官清白則如
琛者殆亦一代偉器未可厚貶者也當時阿琛者稱
其至德與聖人齊蹤鴻名共大賢比迹而誌竟擠之
豐侃之列指爲千秋炯戒毀譽皆失其實論人者固
不可無識哉書其後

甄濟傳

甄濟字孟成少孤力學安祿山強徵爲掌書記濟察祿
山有反謀乃佯病不支歸舊廬祿山反使蔡希德封

刀召之曰卽不可斷其頭來希德至濟書不可以行
四字希德將刀趨前濟神色不變希德乃歎息而去
肅宗立徵至東都館之三司署命受僞爵者羅拜以
愧其心拜太子舍人並侍御史子逢能承父志以顯
濟名

嚴文傳

嚴文正德時由監生任延安府推官理刑欽恤陝人德
之六年考滿乞致仕歸家居三十餘年閉門謝客檢
閱古書眞定守宋公舊在治下請見文曰古人非公
事不見邑宰況郡守乎辭不去後宋公以公務過極

邑欲造見文復避之鄉人莫不敬重焉

成以旂傳

成以旂丁驗村人萬厯時由歲貢任廣州府通判遷知
化州性耿介嫉惡如仇風聲所樹衙蠹里豪在在屏
息廣多盜化州又僻處西鄙以旂銳意安良一時稱
治

楊子鳳傳

楊子鳳合流村人父範以孝義著於鄉子鳳登萬厯丙
午鄉榜性豪邁喜讀諸史每至忠孝節烈事輒拔劍
起舞涕泣悲歌平生慕劉越石甄孟成之爲人初任